

## 诗 词 类

### 南海叙怀

唐·高 骈

万里驱兵过海门，此生今日报君恩。回朝直待烽烟静，不遣征衣有泪痕。

### 即 事

宋·陶 弼

使君合浦来，示我海滨石。千岩秀掌中，大者不盈尺。

### 六月二十日夜渡海

宋·苏 轼

参横斗转欲三更，苦雨终风也鲜晴。云散月明谁点缀？天容海色本澄清。  
空余鲁叟乘桴意，粗识轩辕奏乐声。九死南荒吾不恨，兹游奇绝冠平生。

### 自雷适廉 宿于兴廉村净行院

宋·苏 轼

荒凉海南北，佛舍如鸡栖。忽行榕林中，跨空飞拱榭。  
当门冽碧井，洗我两足泥。高堂磨新砖，洞户分角圭。  
倒床便甘寝，鼻息如虹霓。童仆不肯去，我为半日稽。  
晨登一叶舟，醉兀十里溪。醒来知何处，当路老更迷。

### 夜雨宿净行院

宋·苏 轼

芒鞋不踏利名场，一叶轻舟寄淼茫。林下对床听夜雨，静无灯火照凄凉。

### 廉州龙眼，质味殊绝，可敌荔枝

宋·苏 轼

龙眼与荔枝，异出同父祖。端如柑与橘，未易相可否。  
异哉西海滨，琪树罗玄圃。累累似桃李，一一流膏乳。

坐疑星陨空，又恐珠还浦。图经未尝说，玉食远莫数。  
独使皴皮生，弄色映雕俎。蛮荒非汝辱，幸免妃子污。

### 戏和合浦僧并序

宋·苏轼

合浦僧愈上人，以诗名岭外，将访道南岳，  
留诗壁上云：“闲伴孤云自在飞。”

东坡居士过其精舍，戏和其韵

孤云出岫岂求伴，锡杖凌空自要飞。为问庭松尚西指，不知老桀几年归？

### 瓶笙诗 并行

宋·苏轼

庚辰八月二十八日，刘几仲饯饮东坡，中觴闻笙箫声，杳杳若在云霄间，抑扬往返，粗中音节。徐而察之，则出于双瓶。水火相得，自然吟啸。盖食顷乃已。坐客惊叹，得未曾有。请作瓶诗记之。

孤松吟风细泠泠，独茧长缲女媧笙。陋哉石星逢弥明，蚯蚓窍作苍蝇声。  
瓶中宫商自相磨，昭文无亏亦无成。东坡醉熟呼不醒，但云作劳吾耳鸣。

### 欧阳晦夫惠接鬮、琴枕，戏作诗谢之

宋·苏轼

携儿过岭今七年，晚途更著黎衣冠。白头穿林要藤帽，赤脚渡水须花纒。  
不愁故人惊绝倒，但使俚俗相恬安。见君合浦如梦寐，挽须握手俱汎澜。  
妻缝接鬮雾縠细，儿送琴枕冰徽寒。无弦且寄陶令意，倒载犹作山公看。  
我怀汝阴六一叟，眉宇秀发如春峦。羽衣鹤氅古仙伯，岌岌两拄挟霜纨。  
至今画像作此服，凜如退之加渥丹。尔来前辈皆鬼录，我亦带脱巾欹宽。  
作诗颇似六一语，往往亦带梅翁酸。

闻乔太傅换左藏知钦州，以诗招饮

宋·苏轼

今年果起故将军，幽梦清诗信有神。马革裹尸真细事，虎头食肉更何人？  
阵云冷压黄茅瘴，羽扇斜挥白葛巾。痛饮从今有几日？西轩月色夜来新。

留别廉州张左藏

宋·苏轼

编藿以苴猪，瑾涂以涂之。小饼如嚼月，中有酥与饴。  
悬知合浦人，长诵东坡诗。好在“真一酒”，为我醉宗资。

苏子瞻移合浦寄赠

宋·郭功甫

君恩浩荡似阳春，海外移来住海滨。莫向沙边弄明月，夜深无数采珠人。

越州道中

宋·熊铄

野田秋溜正潺潺，新翠乔林绕舍环。淡日凝烟横别浦，斜风吹雨过前山。  
柴扉初放牛羊出，渔艇方携蟹蛤还。自笑平生爱游览，天教长在水云间。

海角潮声

明·朱勤

孤亭近海海门隈，时听潮声海上来。万水有波俱喷雪，九天无雨自鸣雷。  
沙头震动鸥群散，枕上惊残客梦回。消长古今同一理，险夷犹自在灵台。

还珠亭

明·赵瑶

瑞采含辉水一湾，天生老蚌济民艰。曾驱万命沉渊底，争似当年去不还！

## 南浦生珠四首

明·饶秉鉴

南浦茫茫接海洋，明珠海底久珍藏。贝宫漫说生明月，鲛宝宁知有夜光。  
瑞采晓胜波潋滟，蚌胎时吐水苍茫。也知至宝难长晦，万斛于今拥帝旁。

## 阜市人烟

阜市东来接海涯，市中烟火起楼台。几家骏宇相高下，无数征商自往来。  
民俗喜从今日厚，柴门应为故人开。圣朝自是多丰乐，常听欢声动六街。

## 西门古渡

郡城西出是通津，津渡开来不记春。短棹尚随迎送急，扁舟宁厌往来频。  
一江碧水咸趋海，两岸青山半入云。逝者如斯长不息，眼前谁是济川人。

## 廉江

长江来浩浩，何事得廉名？自是源常洁，因之流亦清。  
浪浮云影动，波静月华明。寄语沧浪客，于兹好濯缨。

## 还珠亭

明·林锦

合浦还珠世所称，危亭移建事更新。若将物理论孚感，一代恩波一代人。

## 大廉山

明·吴廷举

危途疲马信间关，合浦埋轮十日间。国有仁贤惟宝在，家无担石比珠还。  
秋声近与江声接，景色宜兼曙色看。行李纷纷游子，几人不愧大廉山？

## 珠池叹有序

明·顾梦圭

廉州平江、清婴、杨梅、乌坭、断网等池，雷州乐民池，皆产珠也。先朝卒十五六年间或十年一采，间得美珠。迨者三年再采，所得皆碎小。藩臬有司并受

诘责。不知此物钟秀毓奇，生息甚难，冥冥中有鬼神呵护，不容以人力强求者。而顽悍之民，因缘为盗，沿海骚扰。今雷、廉凋敝已极，将有他虞，大为寒心。余承乏摄此任，倘复议采，当效贾生痛哭，疏闻于朝，必不以“无益害有益”也。

汉室嫔嫱无丽饰，南海逍遥养泉客。昭阳新宠斗新妆，照乘之珠苦难得。孟尝美政龚黄班，今人反怨珠来还。玺书三年两次降，骊龙赤蚌皆愁颜。往时中官莅合浦，巧征横索如豺虎。中官肆虐去复来，谁诉边荒无限苦？野老村童不著裨，四山戎马夜纷纷。竹房无瓦瓶无粟，犹折山花迓使君。

### 永安城

明·汤惟允

黑云交蜃气，紫电射龙光。残埤山作障，断岸海为疆，  
深尊愁欲破，欹枕昼偏长。何尔驱驰急？风尘一剑铎。

### 阳江避热入海，至濶洲。夜看珠池作，寄郭廉州

明·汤显祖

春县城犹热，高州海似凉。地倾雷转侧，天入斗微茫。  
薄梦游空影，浮生出太荒。乌舸藏黑鬼，竹节向龙王。  
日射濶洲郭，风斜别岛洋。交池悬宝藏，长夜发珠光。  
闪闪星河白，盈盈烟雾黄。气如虹玉迥，影似烛银长。  
为映吴梅福，回看汉孟尝。弄绡殊有泣，盘露滴君裳。

### 孟太守祠

明·甘泽

为官合浦去珠还，万古流芳天地间。富贵心轻犹敝屣，贞廉名重并高山。  
来时岭外神明惧，去日辕前父老攀。自是仁民恩到骨，至今祠屋祀天南。

## 廉阳八景

明·刘子麒

### 一、合浦晓霞

万顷清波漾古今，霞光影映若关心。只从遗有还珠迹，留与骚人嗣好音。

### 二、廉山时雨

层叠峰峦峙翠城，大廉还自郡侯名。夜来忽见月离毕，流作清泉濯我缨。

### 三、三洞天光

水云深处结幽亭，恍若芙蓉接上冥。箫鼓喧腾鱼掷浪，一湾流绿浸疏星。

### 四、五池云影

极目汪汪盼五池，蛟人何事肯相知？堪夸屏翳忘机念，来往波心绝所私。

### 五、古寺灵钟

萧萧古刹法华寒，闻说崆峒也涅槃。架上晓来犹有湿，可知音响倒盂兰。

### 六、石桥仙艇

架石浮河拟雾虹，巨人仙迹属神工。当年羽士飘飘去，遗下扁舟荡港中。

### 七、海角春风

海角由来地尽头，殊方胜概漫悠游。中流砥柱曾谁是？且看阳和拥蜃楼。

### 八、冠头秋霁

巉岩壁立镇惊涛，独战商炎爽气高。多少朦朧冲巨浪，凭虚一览尽秋毫。

## 采珠行 有序

明·林兆珂

先大父少司马公之总制两粤也，疏罢采珠，捩中官柄，廉人至今尸祝之。兆珂来守是邦，故老犹读采珠中官作威状，咸颂先大父之德不衰。兆珂不敏，不克承先志，惧承平日久，未悉中官恶焰，仍蹈前辙为民害，爰系以词，不计工拙也。

骊龙惊徙蛟人愁，冯夷海若声啾啾。七采珠玑闕不得，重重贝阙遭冥搜。

汉家神武威荒服，越人来贡珊瑚熟。武皇南顾廛宸衷，节钺权寄貂珣属。

太清明月薄蟾蜍，诏书南下大征珠。岁发金钱三百万，渤澥横天尾舳舻。

倏忽狂飙吹浪起，舵折帆摧舟欲圯。哀哀呼天天不闻，十万壮丁半生死。  
死者长葬鱼腹间，生者无语摧心肝。群起争赴鼃鼃窟，那顾安流与急澜！  
蛟鳄磨牙竞相向，积血化为海水丹。恨不远从辽海戍，纵往死地死亦宽。  
今秋天半朱霞赫，内府奇珍应可得。万落千村半已残，后宫犹未增颜色。  
内使自称王爪牙，怒目恣睢限严勒。我祖白简弹中官，九重天子变龙颜。  
诏下明光罢开采，貂珥失色旋长安。吁嗟乎！

“以人易珠”人不见，烟水茫茫寒一片。若使今日孟尝来，珠去无还翻所愿。

### 里巫行 有序

明·薛梦雷

廉郡巫风盛行，病者多不服药而好跳神。文诏频颁，仍执迷不悟。作《里巫行》，尚冀俗之一改也。

里人有病不饮药，神君一来疫鬼却。走迎老巫夜降神，白羊赤鲤纵横陈。  
男女殷勤案前拜：“家贫无肴神弗怪！”老巫击鼓舞且歌，纸钱索索阴风多。  
巫言“汝寿当止此，神念汝虔贖汝死。”送神上马巫出门，家人登屋啼招魂。

### 登冠头岭炮台观海

清·李符清

我官北海家南海，居海今初上海门。大壑有时跳日月，洪波终古荡乾坤。  
炮訇天半蛟龙舞，网集沙滩鸟雀喧。安得仙槎浮海去，直穷牛斗问仙源。

### 登冠头岭呈家幼文总戎

清·李符清

中原南徼尽廉州，南到冠头更尽头。明月五池疑甃社，青天一发是溷洲。  
渔人网晒高沙树，鹵户家移断港舟。万里氛无波浪静，始知边帅足权谋。

### 采珠歌

清·冯敏昌

白龙城外暮云行，珠母海南秋月明。明月渐圆珠渐好，如听船外昼歌声。

胎成舐膈偶然同，星斗茫茫在海中。倒却长空洗明月，月行应在水晶宫。  
铁作珠耙三百斤，蚌螺开甲肉如银。云头一霎风雷起，依旧连筐献海人。  
郎如天上月团圞，妾作明珠欲抱难。珠孕有时空自惜，明月何幸不常寒。  
江浦茫茫月影孤，一舟才过一舟呼。舟舟过去何舟得？得得珠来泪已枯。

### 清乐轩

清·康基田

白鸥海上来，偶逐孤云住。迁客本无家，乃有诛茅处。  
碧藻戏游鳞，明霞掠飞鹭。云构已云颓，清辉宛如故。  
真一酒曾倾，瓶笙诗独赋。神交溯前修，风流有余慕。  
缥渺化人台，烟空出江树。风泉泻幽壑，鱼鸟同旦暮。  
沧浪濯吾缨，试问芙蓉渡。

### 长春亭

清·康基田

孤亭屹中流，两岸交清樾。渚花张素锦，春芳无时歇。  
坡公海外来，结庐烟水窟。沉埋六百载，岁月飘以忽。  
怀古想胜游，苔藓别残碣。仰止在高山，遗踪不可没。  
绣栊与芝楣，凌陂见突兀。白云起蓬蓬，清泉流汨汨。  
灵旗庶来游，把酒酬江月。

### 饯别张明府

清·康基田

主宾互换此开筵，把酒临风胜事传。九曲河桥通碧汉，千家渔火出重渊。  
长春亭畔明如昼，清乐轩前醉欲仙。北辙南辕今昔异，风流儒雅似当年。

### 合浦南湾产海石，偶移一片为屏山，诗以纪之

清·汪注

三山在海中，可望不可知。五岳在中土，可即不可移。

只供阅读 请勿厚叙

神仙或幻妄，跋履苦奔驰。不如我屏上，坐卧皆见之。  
此石在珠海，磊磊藏瑰奇。得非惊涛凝，恐是流云垂？  
俗目讵肯顾，千年沉沙泥。好事偶遇我，颇觉惬意私。  
大力负之走，波澜逐空飞，顿同偈仄地，庭宇生崔嵬。  
要当载归囊，炎海来根扉。我本山中人，丘壑宜相随。  
意行足游历，一壶聊可栖。形求抑末矣，芥子有须弥。

### 长春亭五首（选二首）

清·汪注

过眼浮生水上沤，西归玉局自天游。长春何必当春见，海外移来序已秋。  
“万里瞻天”未滴归，闲云海角任孤飞。亭中看得春常在，到处安心愿不违。

### 和康茂园先生清乐轩、长春亭之作二首，同容州太史赋

清·韩葑

孤云自在飞，着处即可住。云何章丞相，乃无有住处。  
先生九死还，心迹逐海鹜。内徙此淹留，须鬓已非故。  
瓶笙与琴枕，刻画犹屡赋。此轩足千秋，我至有余慕。  
绕舍但春水，当窗列远树。三舍本邮传，百年亦旦暮。  
吁嗟元符间，机已兆南渡。

凌波矗危亭，隔岸散丛樾。春风来无时，芳意不少竭。  
自公移廉来，声名动珠窟。至今六百年，辗转更治忽。  
此亭亦屡废，剔藓读残碣。甘棠有遗爱，不逐寒潮没。  
古井汲不波，小桥走欲兀。寄言守土者，忍使流风汨。  
会当宿永夕，饱看海天月。

### 自省谏回廉作（选三首）

清·朱棣

万里南荒几度来，边城遥寄白云隈。茅茨聚落山头见，舴艋生涯海角回。  
薯蕷作粮充晚爨，鱼虾换酒试新醅。岩疆风土须勤问，莫等乡多宝玉猜。  
绕郭秋来访碧岑，海疆岩壑待重寻。兴廉水可明心迹，合浦珠应鉴古今。  
潮扼龙门一岛重，云连象郡万山深。川原迢递盈千里，保障清平岂易任。  
到郡诚然席未暖，当春别去及秋还。占晴课雨劳尘梦，舍己耘人损病颜。  
野屋半轮窥皎皎，滩舟一枕听潺潺。苍茫岛屿朝来见，疑是江心浮玉山。

### 大廉杂咏（选六首）

清·卜宪义

地连铜柱控烟蛮，名宰归辕未可攀。一自千秋人去后，青青只有大廉山。  
曾说东坡此地来，荷花今傍水亭开。侬家正在还珠岭，几见明珠出蚌胎？  
清景良宵兴最饶，竹楼灯火接兰桡。试看银海三春水，不数钱塘八月潮。  
薄暮归来十里程，山妻稚子候柴荆。圩余常乐人争趁，传说“风流”旧地名。  
三洞原来各一天，五池云影共相连。池开双月寻难得，古刹终宵锁暮烟。  
太守流风遍海隅，生灵久困一时苏。家家昼户天晴后，都嘱阿郎好市珠。

### 东坡亭

清·李经野

当年万里馥无屋，此地千秋建为亭。鱼跃池深春渺渺，鸿飞天远路冥冥。  
孤臣遗像三生石，两月羁栖一客星。邓氏园林藉不朽，东风几度草青青。

### 海角亭口占（二首）

清·赵声

晓风吹角九天闻，万里旌旗拂海云。八百健儿多踊跃，自惭不是岳家军。  
决战由来堪习胆，杀人未必便开怀。宝刀持向灯前看，无限凄凉感慨来。

谢北海总戎刘公鸣盛招饮

清·王传缙

惭愧衡门士，将军折节心。无才堪器使，张宴太情深。  
未果山公醉，敢为梁父吟。容当过细柳，驱策答知音。

北海杂咏

清·王传缙

北海年来路线通，车如流水马如龙。桃源巷口夕阳落，扑面花香酒气浓。  
风景繁华异昔年，层楼叠阁耸云巅。剧怜海角无多地，照水红灯不夜天。  
耳顺年逾一憨翁，如何逊听耳偏聋。宜仙楼上新翻曲，声调随他商变宫。

涸洲

民国·林朱赞

三府辖一洲，一洲控三府。大哉海上防，边人莫将此洲寻常睹。  
前峙九头后冠头，左扼龙门右白虎。形势既胜地复广，屹然直作中流柱。  
往者茅茨未开辟，鼠辈潜依恣啸聚。扁舟出没洪涛间，渔者愀然商者苦。  
数十年来海宇清，边防将帅显威武。民既有卫渐垦荒，落落于今几千户。  
向令小丑尚跳梁，那得苦海变乐土。可知防边贵有谋，莫以蕞尔不足抚。

无题

民国·林朱赞

曾上冠头跨马鞍，山河不似旧时宽。珠池权利人争涉，铜柱盟词敌早寒。  
国事抱薪将救火，人情见炙始求弹。太平自合耽歌舞，上下熙熙各宴安。  
电光灯影缀楼台，眼界于今又一开。花册行家增旧额，米珠酿户出新醅。  
工商发达推茶肆，巫覡精能胜药材。听说今年还赛会，彩幡金鼓逐神回。

## 北海茶亭题壁

民国·弘能

棋枰角胜日纷纷，一局雌雄固未分。问鼎频繁奔政客，易旗早晚替将军。  
禅门凛凛森兵气，海角沉沉布战云。驻锡难寻干净土，高亭望断送斜曛。

## 题荔枝

齐白石

此生无计作重游，五月垂丹胜鹤头。为口不辞劳跋涉，愿风吹我到钦州。  
自晚中年不苦思，七言四句谓为诗。一朝百首多何益，幸独钦州好荔枝。

## 廉阳道中

民国·陆开梅

仆仆风尘道且长，又携孤剑出廉阳。痛民涂炭曾流涕，为国捐躯愿赴汤。  
无力输财师卜式，伤心对镜老冯唐。兴亡未了匹夫责，亲上平夷表一章。

## 野桥别墅落成

民国·陆开梅

问舍无心鬓易华，行年七十始成家。玉成聊借他山石，寒林春暖恰栖鸦。

## 军抵山口

陈铭枢

犁庭扫穴殄蚩尤，军报遥传琮管收。岂必兵戈皆刃血，未辞戎马解民愁。  
廉山在望家还好？珠浦生光政待修，尚有中原期北定，他年重唱大刀头。

(以上诗词摘自《珠浦历代诗选注》黄家蕃、林宝光选注)

## 北海游泳

陈铭枢

挥师南指震雷霆，父老犹能说姓名。网撒何人纵蛟鳄，陆沉无计遏鯨鯨。  
运段重见珠还浦，尘垢须凭海濯纓。浮沉只逐中流转，途遥老骥更犬征。

(1955年夏视察北海时作)

### 宋宁越郡丞·南海吴文震诗二首

地得名贤管巨鳌，民逢仁使沐屯羔。岩三已入图经载，石六难磨袞字褒。  
万古山川因弼重，千年风节仰崔高。我来起敬前修样，请以身先律吏饕。  
森森翠玉护花城，突兀如开古锦屏。石耸六峰鳌载首，岩名三海蜃遗腥。  
凤仪栖处钟人瑞，蟾窟光中泄桂馨。此地自融春淑气，谁将铜臭污山灵？

### 明都督同知欧信诗

提兵西驻访云岩，淑气浮光杳霭间。石乳滴泉和雾紫，山花飘锦点苔斑。  
昔年题壁人何在？今日诗成客醉还。惟有赤忠思报国，喜将英气寓灵山。

### 明知府饶秉鉴诗

黑色西南洞，开从太古先。每因人采蚌，疑是海为田。  
花落岩前雨，人游世外天。传闻学仙侣，曾此谢尘缘。  
偶来山海洞，喜见洞沉沉。石壁诗题满，苔阶草长深。  
远山分黛色，鸣鸟弄春音。到此尘嚣静，悠然惬素心。

### 明参政黄锅诗

三海岩前半绿苔，寻芳登眺亦奇哉。月移松影依山转，风带猿声绕树来。  
佛顶有天泉乳滴，石坛无鹤洞门开。烟霞影趣勤收拾，兴尽何人为举杯？

### 金事顾伊原韵

曲径萦纒绕翠苔，岩前景趣极幽哉。云霞影向空中堕，钟鼓声从石里来。  
万古山川跨地胜，一方图画自天开。同游总是英雄客，仗剑临风各尽才。

(五诗均摘自北海市志办历史资料卷4)

### 田汉吊冯墓口占七律一首

泥桥岭畔古城东，且驻征车吊萃翁。松啸为闻嘶战马，花香端合献英雄。  
扶妖江左成遗憾，抗法关南有大功。近百年来多痛史，论人应不失刘冯。

(摘自北海市志办历史资料卷4)